

el coza se contenteria su ducati 4000, et vene el coza a caixa di l'orator con il consolo et nostri merchadanti, et concluse con l'ambasador in ducati 4000 a l'anno per tre mude. El coza si parti dicendo voleva farlo a saper al signor Soldan, e ritornò poi la sera dito coza, dicendo aver referito al Soldan quanto era seguito in tal materia, et che sua signoria se haveva turbà, digando che a tante ofexe che li havevano facte tuto havea perdonato, e ch'el non havea voluto conzar mastela con nui di danari, che zenoesi havea conzà el suo garbuio in ducati 50 milia, che sono minimi a nostra comparison, et che da nui non voleva altro che se regulasse le cosse di la merchadantia siche se podesse continuar con bona amittitia e utilità de una e l'altra parte, e ch'el voler suo era de voler ducati 10 milia ogni muda per el danno dil piper, e acciò l'orator cognoscesse l'amava grandementè, se voleva remover di la sunma e venir in la mità, e se li desse ducati 5000 per 3 mude proxime a l'anno, sperando, da poi le tre mude, otenir victoria nei mari de India con l'armada el prepara contro portogalexi e che il piper dieba ritornar al corso suo per poterlo meter al prezzo antico, e non seguendo *ut supra*, passà le tre mude, sia in libertà di la nostra nation continuar il sopradito accordo. Et cussì, con el nome de Dio, l'ha parso a tutti i nostri de concluder, e cussì è sta fato, e fu fato andar l'orator, di hordine del signor Soldan, con i sopraditi mori a caixa del chatibiser, che è il suo cancelier grandò, homo si pol dir solo notabile al presente in quel regno e di grandissima autorità, per regular i capitoli e far i comandamenti achadevano zercha i capitoli di Alexandria. L'orator ha voluto questo precipuo che la merchadantia sia libera, et che nostri merchadanti posino vender a chi li piace et comprar da chi li piace, e romanendo d'accordo con merchadanti, mori, ch'el coza non li possa romper li soi merchadi, nè impedirli el scriver de essi merehadi. E questo è il tutto, perchè ste mude passade haveano introduto una forma cativa contra de nui, ch'el coza facea vender e comprar come li piaceva, con ruina di la merchadantia. Dal canto nostro, mori hanno voluto se li meta un capitolo che li arzenti si porterano con le galie di Alexandria non se possa vender in galia, ma che i pagano a le porte i soi dreti consueti e poi li possi vender a chi li piace, dicendo nostri fraudava i dreti del signor Soldan. Sono stà coreti e riconzati alcuni altri capitoli, in sustantia come erano al tempo dil Soldan Cartibei, tutte buzzare et di pocho momento; et cossi regolato el tutto, con comandamenti che siano observati e fato

bona compagnia a la nostra nation e ampla justicia ne le cosse li achadeva; e si observerano quanto ha promesso, si potrà far la merchadantia con bon cuor. De le cosse di damaschini e tuti soriani, è stà ottenuto i comandamenti *ad vota* che hanno rechiesto con parole molto efichaze, cometando a quelli signori fazino justicia e bona compagnia, perchè ne haveva tolti in bona gratia più che mai. Et expediti tal capitoli, l'orator andò dal Soldan e domandoli *de gratia* che i frati de Jerusalem fosseno liberati e che potesseno ritornar a le sue devotion ai soi lochi, e che la nostra galia de pelegriani potesse venir al suo viazo con i pellegrini justa il consueto. Soa signoria fu contenta et compiacete l'ambasador, con questa condition ch'el voleva che l'aprir del Santo Sepulero fosse deferido fino al zonzar della nostra galia de pelegriani al Zafò; siche i frati di Jerusalem sono andati ai soi lochi santi di Jerusalem; è stà bella concession, hessendo stà negata a l'orator francese.

Dimandò poi di gratia la liberation de tuta la nostra nation e di nostri subditi, e li concesse gratiosamente, et sono di nostri stati zà do anni cussì presoni e in destreta con gran strusie. Ebono grandissima alegreza, e sono assa' numero. L'è vero che di le robe di questi greci fono presi, per esser stà le robe consumate, hanno convenuto aver pacientia dil danno seguito.

El signor Soldan ha quatro prave parte pericoolose in un signor: è superbissimo, avarissimo, colerico et la quarta, che inhandisse ogni cossa, è ignorante, e bisogna aver compasso di prudentia chi è per tratar cosa alcuna con soa signoria. L'orator li era in gran gratia, e parlava amorevolmente con lui, e l'ultima audientia secreta, quando fo a tuor licentia, prima con bone parole e con la man mostrava segni di amorevoleza, come fa 116 quelli che non intende la lengua, e mostrò con le man voler abrazar, e l'orator predito subito corse et se li butò ai piedi, perchè il Soldan era sentà in terra su uno tapedo d'oro e li basò la vesta. Su queste amorevoleze, l'orator intrò su la persona di sier Piero Zen, e il Soldan disse: « Mi è stà dito che tu è stà ambasador a pur assè signori, et che da tutti tu è parti ben contento. Voglio che da mi tu te parti con el tuo cuor più satisfato che da niun altro Signor che tu sia stà. Te dono el consolo de Damasco per tuo schiavo; fa quel che te piace di fati soi, che tutto è remesso a ti solo ». L'ambasador basò la terra al modo de mori ringratiando la sua signoria, e otenne el fusse perdonà al dito sier